

AUGLÝSING

um staðfestingu safnaráðs á stofnskrá Borgarsögusafns Reykjavíkur.

Með vísan til 3. tl. 10. gr., sbr. c-lið 2. mgr. 7. gr. safnalaga nr. 141/2011, staðfesti safnaráð þann 22. september 2014 stofnskrá Borgarsögusafns Reykjavíkur.

Stofnskráin er birt sem fylgiskjal með auglýsingu þessari.

Reykjavík, 25. júní 2015.

F.h. safnaráðs,

Ágústa Kristófersdóttir framkvæmdastjóri.

Fylgiskjal.

STOFNSKRÁ fyrir Borgarsögusafn Reykjavíkur.

I. KAFLI

Um stjórnun safnsins og verksvið þess.

1. gr.

Borgarsögusafn Reykjavíkur er safn í eigu Reykjavíkurborgar. Menningar- og ferðamálaráð Reykjavíkur fer með hlutverk stjórnar safnsins, gerir tillögur til borgarráðs um stefnumörkun í málefnum þess, hefur eftirlit með rekstri og að samþykktum og stefnu sé fylgt. Stjórn safnsins er að öðru leyti í höndum safnstjóra.

Rekstrarkostnaður safnsins greiðist úr borgarsjóði í samræmi við fjárhags- og starfsáætlun safnsins ár hvert. Safnið er ekki rekið í hagnaðarskyni.

2. gr.

Borgarsögusafn Reykjavíkur starfar samkvæmt safnalögum nr. 141/2011, lögum um menningarminjar nr. 80/2012 og lögum um skil menningarverðmæta til annarra landa nr. 57/2011 og í samræmi við siðareglur Alþjóðaráðs safna, ICOM (International Council of Museums).

Undir Borgarsögusafn Reykjavíkur heyra Árbæjarsafn, Landnámssýningin Reykjavík 871+/-2, Víkin – Sjóminjasafn Reykjavíkur, Ljósmyndasafn Reykjavíkur og Viðey ásamt sérsöfnum og safnheildum.

Borgarsögusafn Reykjavíkur hefur umsjón með menningarminjum í Reykjavík og veitir ráðgjöf um meðferð og varðveislu ljósmynda í eigu borgarinnar.

3. gr.

Borgarsögusafn Reykjavíkur skal stuðla að varðveislu menningarminja í Reykjavík með þeim hætti að borgarbúar og aðrir gestir hafi sem bestan aðgang að menningararfi í borginni og að ljósmyndum í eigu þess. Á safnsvæði Árbæjarsafns skulu vera sýningar sem gefa mynd af húsakosti, hýbýla- og lifnaðarháttum í Reykjavík. Á Landnámssýningunni skal fjalla um upphaf byggðar í Reykjavík og skal merkja helstu minjastaði í Reykjavík og miðla þar fróðleik um þá. Í sýningarsal Ljósmyndasafns Reykjavíkur eru haldnar ljósmyndasýningar. Á Sjóminjasafni Reykjavíkur eru haldnar sýningar sem auka þekkingu og skilning á sambúð manns og sjávar frá upphafi byggðar til nútímans. Starfsemi í Viðey hefur að leiðarljósi að eyjan sé útivistarsvæði og vettvangur fræðslu um menningu og náttúru.

Helstu verkefni Borgarsögusafns Reykjavíkur eru:

1. Að safna, skrásetja, varðveita og rannsaka menningarminjar, sem eru einkennandi fyrir menningararf borgarinnar og varpa ljósi á sögu hennar og menningu. Sama gildir um minjar tengdar sjó og sjómennsku og ljósmyndir sem einkanlega hafa gildi fyrir sögu Reykjavíkur.

2. Að sinna minjavörslu í Reykjavík í samræmi við ákvæði laga um menningarminjar nr. 80/2012 og halda skrár yfir fornleifar, hús og mannvirki í Reykjavík.
3. Að sinna menningaruppeldi og fræðslu um sögu Reykjavíkur, þróun sjávarútvegs og sambúð Íslendinga við hafið og lífríki þess, ljósmyndina og menningu, náttúru og sögu Viðeyjar með sýningarhaldi, fræðslustarfsemi og útgáfu í samræmi við fjárhags- og starfsáætlun ár hvert.
4. Að gera íbúum borgarinnar og gestum hennar kleift að upplifa söguna og skynja fortíðina á fjölbreyttan hátt með lifandi tengingu fortíðar og nútíðar.

Borgarsögusafn Reykjavíkur skal setja sér stefnu, leiðarljós og markmið fyrir starfsemi og rekstur. Stefnan skal endurspeglar þær forsendur fyrir sameiningu safnanna sem lágu til grundvallar samþykktar borgarstjórnar Reykjavíkur frá 3. desember 2013.

4. gr.

Borgarsögusafn Reykjavíkur skal opið almenningi á auglýstum tímum. Safnið og starfsemi þess skal kynnt almenningi, ferðamönnum og nemendum í samráði við skólayfirvöld í Reykjavík.

Borgarsögusafn Reykjavíkur er heimilt að taka aðgangseyri og gjald fyrir veitta þjónustu í samræmi við fyrirmæli í 19. gr. safnalaga nr. 141/2011. Gjöld skulu innheimt samkvæmt staðfestri gjaldskrá. Allur arður af starfsemi safnsins rennur til safnsins sjálfs.

5. gr.

Sviðsstjóri menningar- og ferðamálasviðs ræður safnstjóra til fimm ára í senn að viðhöfðu samráði við menningar- og ferðamálaráð. Safnstjóri skal hafa sérfræðimenntun á starfssviði safnsins, þekkingu á safnastarfi og reynslu af rekstri safna. Starfið skal auglýst samkvæmt ákvæðum í 73. gr. samþykktar um stjórn Reykjavíkurborgar og fundarsköp borgarstjórnar.

Sviðsstjóri getur ákveðið að framlengja ráðningu safnstjóra til fimm ára í senn að höfðu samráði við menningar- og ferðamálaráð.

Safnstjóri ber ábyrgð á rekstri og stjórnarsýslu safnsins og þeirra starfsstaða sem undir það heyrar, þ.m.t. fjármálum, starfsmannamálum og á framkvæmd ákvarðana menningar- og ferðamálaráðs.

Safnstjóri ber ábyrgð á faglegri starfsemi safnsins, skipuleggur sýningar þess og ber ábyrgð á viðhaldi safnkosts og búnaðar.

6. gr.

Safnstjóri hefur umsjón með menningarminjum í Reykjavík. Hann ber ábyrgð á skráningu safnkosts, fornleifa, húsa og mannvirkja, rannsóknum og eftirliti þeirra.

Safnstjóri er ráðgjafi borgaryfirvalda um verndun menningarminja í Reykjavík og um önnur menningarsöguleg verkefni. Leita skal umsagnar safnstjóra er fjallað er um verndun fornleifa, húsa og mannvirkja, svo sem við skipulagsgerð og framkvæmdir.

Safnstjóri gerir tillögur til menningar- og ferðamálaráðs um mál sem varða verndun menningarminja.

Safnstjóri fylgist með söfnun örnefna, útgáfu örnefnaskrár og merkingu minjastaða, fornleifa og náttúruminja.

7. gr.

Borgarsögusafn Reykjavíkur hefur umsjón með eða heimilar eftirgerð eftir myndefni og innheimtu birtingargjalds f.h. rétthafa. Safnið semur við rétthafa höfundaréttar skv. ákvæðum höfundalaga.

Safnstjóri ber ábyrgð á varðveislu frummynda ljósmynda í safninu, eða í tryggum geymslum á vegum þess.

Safnstjóra skal þó heimilt að lána einstakar myndir úr safninu um takmarkaðan tíma til sýninga annars staðar.

II. KAFLI

Um aðföng og gjafir.

8. gr.

Safnstjóri metur hvort gjafir sem safninu eru boðnar, skuli þagnar. Þótt safnið veiti mun eða myndasafni viðtöku sem gjöf, er ekki heimilt að undirgangast kvaðir um sérstaka aðra meðferð nema með sérstöku samþykki borgarráðs. Gjöf skal fylgja gjafabréf. Gjafir og fjárframlög til safnsins eru frádráttarbær til skatts, sbr. ákvæði laga um tekjuskatt nr. 90/2003.

Óheimilt er að selja eða farga safngripum nema ríkar ástæður séu til og á grundvelli grísjunar-áætlunar sem höfuðsafn samþykkir, sbr. 17. gr. safnalaga nr. 141/2011 og að fengnu samþykki menningar- og ferðamálaráðs.

III. KAFLI

Heimild til að setja á stofn styrktarfélag.

9. gr.

Heimilt er að stofna styrktarfélag við Borgarsögusafn Reykjavíkur. Skal aflafé þess sett í sérstakan sjóð og varið til afmarkaðra verkefna.

IV. KAFLI

Um ráðstöfun safnkosts verði safnið lagt niður eða rekstrarformi breytt.

10. gr.

Verði safnið lagt niður eða rekstrarformi breytt skal borgarráð ráðstafa safnkosti þess að fenginni tillögu menningar- og ferðamálaráðs í samráði við Þjóðminjasafn Íslands, sbr. 12. og 16. gr. safnalaga nr. 141/2011. Öðrum eignum verður ráðstafað að höfðu samráði við ráðuneyti mennta- og menningarmála.